

## Тўртликлар



11:08 / 20.05.2024 1674

Дилни изҳор айламоққа сўзни яратди,  
Сўзни бесўз айтмоқликка кўзни яратди.  
Сўз билан сўз маъносининг фарқи бисёрдир,  
Мисол қилиб атлас билан бўзни яратди.

\* \* \*

Китоб бозорида китоблар ҳар хил,  
Мевадек ранг-баранг, мевадек сархил.  
Бири асл асар, ноёбу нодир,

Бири-чи, пишмаган мевадек тахир.

\* \* \*

Тил тешадир, билмоқ керак ушламоқни,

Қўлга олма гар билмасанг ишламоқни.

Тўғри тутсанг, тил тешаси тош кесади,

Эгри тутсанг, тил тешаси дил тешадир.

\* \* \*

Фикринг бўлсин мисли тиниқ заррабин,

Кичикни хор қилма, тутар уволи.

Сулаймон измида бўлса-да дев, жин,

Ақл ўргатган унга митти чумоли.

\* \* \*

Ари гул ахтариб, қанча йўл босиб,

Зарра бол ишқида заҳмат ҳўплайди.

Билади: ўзига қилмайди насиб,

Болни гул экканга атаб тўплайди.

\* \* \*

«Барака, тўкинлик манбаидир қўй»,

Шул ҳадисни эсла, қўйга меҳр қўй.

«Ҳалво» деган билан оғиз чучимас,

Қўйга меҳр қўйсанг, танбалликни қўй.

**Зайниддин Баҳриддинов**

**«Ҳилол» журнали 10(55) сони**

